



## Agihan Zakat Oleh UiTM Cawangan Sabah: Suatu Sorotan

RAZIZI TARMUJI

Universiti Teknologi MARA Cawangan Sabah, Beg Berkunci 71, 88997, Kota Kinabalu, Sabah, Malaysia  
raziz106@uitm.edu.my

NOR ALHANA ABD MALIK

Universiti Teknologi MARA Cawangan Sabah, Beg Berkunci 71, 88997, Kota Kinabalu, Sabah, Malaysia  
noral801@uitm.edu.my

ABDUL KADIR ROSELINE

Universiti Teknologi MARA Cawangan Sabah, Beg Berkunci 71, 88997, Kota Kinabalu, Sabah, Malaysia  
akrosline@uitm.edu.my

SAMSUDDIN MOHD AMIN

Universiti Teknologi MARA Cawangan Sabah, Beg Berkunci 71, 88997, Kota Kinabalu, Sabah, Malaysia  
samsuddin@uitm.edu.my

### Abstrak

Institusi zakat memainkan peranan besar dalam memberi bantuan kewangan kepada pelajar di institusi pengajian tinggi. Peranan institusi zakat ini semakin penting terutamanya semasa wabak Covid-19 yang banyak menjejaskan pendapatan orang ramai. Pelbagai bentuk bantuan pendidikan diwujudkan dengan menawarkan biasiswa, dermasiswa dan lain-lain bantuan kewangan tambahan menggunakan dana zakat. Bagi mengurangkan birokrasi permohonan zakat oleh pelajar dan menambah kecekapan agihan, banyak institusi pengajian tinggi (IPT) dilantik sebagai penolong amil untuk menguruskan agihan zakat kepada pelajar. Universiti Teknologi MARA (UiTM) merupakan IPT pertama yang telah dilantik sebagai penolong amil oleh Lembaga Zakat Selangor (LZS) pada tahun 1998. Manakala di Sabah, UiTM Cawangan Sabah telah memeterai MoU dengan Majlis Ugama Islam Sabah (MUIS) pada tahun 2012 sebagai asas kerjasama antara kedua-dua institusi tersebut dalam pelbagai bidang berkaitan pendidikan, penyelidikan dan bantuan kewangan. Bermula tahun 2014, pihak MUIS telah menyumbang dana zakat kepada pihak UiTM Cawangan Sabah untuk menguruskan pengagihannya kepada pelajar. Kertas kerja ini bertujuan untuk mengenalpasti proses agihan zakat kepada pelajar yang dikendalikan oleh pihak UiTM Cawangan Sabah. Kajian mendapati proses agihan zakat di UiTM Cawangan Sabah adalah bersistematik dan memberi fleksibiliti kepada pelajar dalam permohonan zakat mereka khususnya ketika situasi pandemik Covid-19 apabila kuliah dijalankan secara atas talian sepenuhnya. Namun begitu terdapat beberapa cabaran dalam mengurus proses agihan zakat tersebut dan cadangan untuk penambahbaikan sistem agihan zakat juga diutarakan.

**Kata kunci:** agihan zakat, UiTM, permohonan zakat

### 1. Pendahuluan

Universiti Teknologi MARA merupakan universiti yang terbesar di Malaysia yang mempunyai 165,594 orang pelajar di 34 buah kampus di seluruh negara (Bahagian Hal Ehwal Pelajar UiTM, 2022). Sesuai dengan kedudukan UiTM sebagai universiti khusus untuk meningkatkan tahap pendidikan dan seterusnya tahap sosio ekonomi Bumiputera, maka universiti ini mempunyai tanggungjawab yang berat bagi memastikan setiap pelajar mampu meneruskan pengajian mereka di universiti ini dengan baik. Lebih-lebih lagi jika dilihat latar belakang ekonomi majoriti keluarga pelajar di UiTM adalah merupakan dari kalangan B40.

Cabaran semakin getir apabila wabak Covid-19 melanda negara dan dunia sejak tahun 2020 apabila ramai pelajar terkesan dari sudut ekonomi untuk meneruskan pengajian mereka di UiTM. Melihatkan pada risiko jangkitan virus ini yang boleh membawa kepada kematian, kerajaan Malaysia telah melaksanakan Perintah Kawalan Pergerakan (PKP) dan Perintah Kawalan Pergerakan Diperketatkan (PKPD). Perintah Kawalan Pergerakan (PKP) diumumkan oleh Perdana Menteri, Tan Sri Muhyiddin bin Haji Muhammad Yassin pada 16 Mac 2020 (Buletin TV3, Youtube). Terdapat enam arahan yang terkandung dalam Perintah Kawalan Pergerakan ini iaitu:

- Larangan menyeluruh pergerakan dan perhimpunan ramai termasuk aktiviti keagamaan, sukan, sosial dan budaya;
- Sekatan menyeluruh semua perjalanan rakyat Malaysia ke luar negara;
- Sekatan kemasukan semua pelancong dan pelawat asing ke dalam negara;
- Penutupan semua Taska, Sekolah Kerajaan dan swasta dan lain-lain institusi pendidikan rendah, menengah dan pra-universiti;



- Penutupan semua Institusi Pengajian Tinggi (IPT) Awam dan Swasta serta Institut Latihan Kemahiran di seluruh negara; dan
- Penutupan semua premis kerajaan dan swasta kecuali yang terlibat dengan perkhidmatan penting negara (essential services) (Pejabat Perdana Menteri Malaysia, Perintah Kawalan Pergerakan).

Tujuan Perintah Kawalan Pergerakan dilaksanakan ialah untuk membendung penularan wabak COVID-19 di Malaysia, dengan cara menghentikan rangkaian penyebaran wabak COVID-19 (The Malaysian Medical Gazette, 2022).

Penutupan semua Institusi Pengajian Tinggi (IPT) menyebabkan UiTM meneruskan sesi pengajaran dan pembelajaran secara terbuka dan jarak jauh (ODL). Perkara ini mendatangkan masalah terutamanya kepada pelajar yang tidak mempunyai laptop sendiri dan kawasan kediaman mereka yang tidak mempunyai liputan internet. Oleh itu UiTM turut mengambil inisiatif untuk membantu pelajar yang terkesan dari sudut ekonomi dengan pelbagai bantuan yang diberikan seperti penangguhan bayaran yuran pengajian, bantuan laptop, bantuan data internet dan lain-lain.

Oleh itu Bahagian Zakat, Sedekah dan Wakaf UiTM yang bertanggungjawab mengagihkan bantuan zakat kepada pelajar juga memainkan peranan untuk membantu pelajar yang terkesan dari sudut ekonomi. Manakala di UiTM Cawangan Sabah, peranan tersebut dilakukan oleh Unit Zakat, Sedekah dan Wakaf.

### Sejarah Pelaksanaan Pengurusan Zakat di UiTM

Sejarah pelaksanaan pengurusan zakat di UiTM bermula dengan penyediaan kertas konsep bertajuk “Konsep Q5S Institut Teknologi MARA (ITM)” yang kemudiannya dibentangkan kepada Pengarah Jabatan Agama Islam Selangor (JAIS) dan Pengurusan Pusat Zakat Selangor (PZS) pada 16 Oktober 1996 di Ibu Pejabat Pusat Zakat Selangor, Petaling Jaya. Di dalam kertas kerja ini dijelaskan secara terperinci konsep 5S yang dimaksudkan iaitu *Al-Sunnah, Solat, Siyam, Syahsiyah* dan *Sodaqah* dan bagaimana ia akan menatijahkan Insan Soleh (Jawatankuasa Perunding Projek Q5S ITM, 1996).

Kertas konsep ini juga telah dibentangkan di dalam Mesyuarat Pengurusan Dalaman ITM dan Mesyuarat Ahli Jawatankuasa Penubuhan Tabung Amanah Zakat ITM. Hasil daripada pembentangan tersebut, pihak pengurusan ITM bersetuju mengenai cadangan pelaksanaan sistem pengurusan zakat dan berusaha menyediakan infrastruktur yang diperlukan bagi merealisasikan tujuan tersebut.

Susulan daripada itu, Jawatankuasa Perunding Tabung Amanah Zakat ITM telah mengemukakan Kertas Cadangan Pungutan dan Agihan Zakat Di ITM untuk dikemukakan kepada Jawatankuasa Perunding Hukum Syarak (Fatwa) Majlis Agama Islam Selangor (MAIS) (Jawatankuasa Perunding Tabung Amanah Zakat ITM, 1997). Kertas cadangan ini juga kemudiannya dikemukakan kepada Jawatankuasa Pelaburan Baitulmal, Majlis Agama Islam Selangor pada 24 Mac 1997. Hasil daripada usaha tersebut, Majlis Agama Islam Selangor telah memberikan kebenaran kepada UiTM untuk melaksanakan pungutan dan agihan zakat di kalangan warganya melalui surat bertarikh 14 Januari 1998 bersamaan 15 Ramadhan 1418 (Nazrudin Hashim & Mohd Zainoddin Mustaffa, 2012). Ini sekaligus menjadikan UiTM sebagai universiti awam pertama yang menjadi perintis pelantikan Penolong Amil-LZS. Sehingga 2015 terdapat sembilan buah institusi pendidikan awam dan swasta di Selangor diberikan pelantikan tersebut (Muhammad, R. *et al.*, 2017).

Unit Zakat UiTM kemudiannya ditubuhkan dan diletakkan di bawah Penolong Rektor Pusat Khidmat Islam Bersepadu (PKIB) hingga Jun 2001. Bermula Jun 2001 hingga 13 Januari 2004, operasinya berpindah kepada tanggungjawab Pusat Pemikiran dan Kefahaman Islam (CITU). Setelah dana Sedekah UiTM ditubuhkan pada tahun 2010, namanya bertukar kepada Unit Zakat dan Sedekah. Unit ini bertukar nama menjadi Unit Zakat, Sedekah dan Wakaf pada tahun 2012 untuk turut bertanggungjawab meluaskan fungsi wakaf di UiTM. Seterusnya apabila CITU dinaiktaraf menjadi Akademi Pengajian Islam Kontemporari pada Oktober 2014, unit ini juga bertukar nama menjadi Pusat Zakat, Sedekah dan Wakaf (Najahudin *et. al.*, 2018). Apabila berlaku sekali lagi penstrukturan semula ACIS pada Ogos 2019, unit ini menjadi Bahagian Zakat, Sedekah dan Wakaf yang diasingkan daripada ACIS dan diletakkan terus di bawah seliaan Naib Canselor (Pekeliling Naib Canselor, 2019). Tadbir urus zakat di UiTM meliputi tiga lapisan pengurusan iaitu Jawatankuasa Akaun Amanah Zakat UiTM, Jawatankuasa Agihan Zakat UiTM (di Shah Alam dan Kampus Cawangan) dan Bahagian Zakat, Sedekah dan Wakaf yang menguruskan kutipan dan agihan zakat (Najahudin *et. al.*, 2019).

### Pengurusan Zakat di UiTM Cawangan Sabah

Di peringkat UiTM Cawangan Sabah, pengurusan agihan wang zakat UiTM Cawangan Sabah diurus oleh Unit Hal Ehwal Islam (HEI). Apabila berlaku penstrukturan semula ACIS pada tahun 2019, maka UiTM Cawangan Sabah juga menubuhkan Unit Zakat, Sedekah dan Wakaf (ZAWAF) pada Oktober 2020 untuk menguruskan hal-ehwal berkaitan zakat, sedekah dan wakaf di kampus.

Perbelanjaan dana zakat di peringkat UiTM Cawangan Sabah adalah melalui persetujuan Jawatankuasa Agihan Zakat dan Sedekah yang dipengerusikan oleh Rektor dan ahlinya adalah Timbalan Rektor HEP (merangkap



Pengerusi Ganti), Ketua Pusat Pengajian ACIS, Wakil Pendaftar, Wakil Bendahari, seorang Pakar Rujuk Zakat dan Koordinator Unit ZAWAF sebagai setiausaha (Arahan Amanah Zakat UiTM, 2019).

Semua permohonan agihan zakat perlu dibentang dan diluluskan oleh Jawatankuasa Agihan Zakat dan Sedekah. Namun penurunan kuasa untuk meluluskan peruntukan segera diberikan kepada Pengerusi Jawatankuasa Agihan Zakat dan Sedekah sehingga RM5000.00. Kelulusan segera ini kemudian perlu dibentang dan diluluskan dalam mesyuarat jawatankuasa agihan (Najahudin *et. al*, 2019).

Akaun ini dikawal oleh Bendahari UiTM di bawah pengendalian Jawatankuasa Akaun. Pengawasan dan pengurusan Akaun ini perlu sentiasa tertakluk kepada terma-terma Arahan Akaun ini, peruntukan-peruntukan Arahan Perbendaharaan serta peraturan-peraturan kewangan yang berkaitan dengannya dan apa-apa arahan lain yang dikeluarkan oleh Perbendaharaan dan UiTM dari semasa ke semasa. Semua terimaan dan bayaran yang dibuat kepada, dan dari Akaun ini hendaklah diperakaunkan oleh Bendahari UiTM. (Arahan Amanah Zakat UiTM, 2019).

## 2. Dapatan dan Perbincangan

### Agihan Zakat di UiTM Cawangan Sabah

UiTM Cawangan Sabah telah memeterai MoU dengan Majlis Ugama Islam Sabah (MUIS) pada tahun 2012 sebagai asas kerjasama antara kedua-dua institusi tersebut dalam pelbagai bidang berkaitan pendidikan, penyelidikan dan bantuan kewangan. Bermula tahun 2014, pihak MUIS telah menyumbangkan dana zakat kepada pihak UiTM Cawangan Sabah sebanyak RM100,00.00 setahun untuk menguruskan pengagihannya kepada pelajar. Jumlah ini meningkat kepada RM220,000.00 setahun pada tahun 2020 dan 2021. Selain MUIS, sumber dana zakat UiTM Cawangan Sabah juga diterima daripada potongan zakat gaji staf di Lembaga Zakat Selangor yang akan dipulangkan semula 50% ke kampus, badan-badan korporat dan syarikat perniagaan sekitar Sabah. Jumlah keseluruhan yang diterima daripada tahun 2011 sehingga 2021 adalah hampir RM3 juta. Wang tersebut telah diagihkan kepada 7300 orang pelajar UiTM Cawangan Sabah (Unit Zakat, Sedekah dan Wakaf, 2022).

Jadual 1: Jumlah Agihan Zakat UiTM Cawangan Sabah dari tahun 2011-2021

| Bil    | Tahun | Jumlah Pelajar | Jumlah Agihan Zakat (RM) |
|--------|-------|----------------|--------------------------|
| 1      | 2011  | 48             | 19,200.00                |
| 2      | 2012  | 68             | 33,817.00                |
| 3      | 2013  | 84             | 42,998.00                |
| 4      | 2014  | 275            | 138,360.00               |
| 5      | 2015  | 1100           | 435,630.00               |
| 6      | 2016  | 1441           | 543,100.00               |
| 7      | 2017  | 1093           | 362,150.00               |
| 8      | 2018  | 727            | 207,100.00               |
| 9      | 2019  | 905            | 366,350.00               |
| 10     | 2020  | 960            | 406,750.00               |
| 11     | 2021  | 599            | 354,500.00               |
| JUMLAH |       | <b>7300</b>    | <b>2,909,955.00</b>      |

Sumber: (Laporan Agihan Zakat UiTM Cawangan Sabah Tahun 2021)

Jadual 1 di atas menunjukkan bilangan penerima zakat dari kalangan pelajar dan jumlah agihan zakat yang diterima selama 11 tahun dari tahun 2011 hingga tahun 2021. Peningkatan besar jumlah agihan zakat bermula pada tahun 2014



apabila pihak UiTM Cawangan Sabah menerima peruntukan zakat daripada pihak MUIS sebanyak RM100,000.00 untuk diagihkan kepada pelajar. Hasilnya pada tahun tersebut seramai 275 orang pelajar menerima zakat sebanyak RM138,360.00 berbanding hanya 84 orang penerima zakat sebanyak RM42,998.00 pada tahun sebelumnya.

Agihan yang tertinggi adalah pada tahun 2016 apabila sebanyak RM543,100.00 berjaya diagihkan kepada 1441 orang pelajar. Agihan yang tinggi ini didorong oleh pemberian zakat dari pihak PZS-MUIS dan juga badan-badan swasta yang berminat untuk menyumbang kepada kebajikan pelajar.

### Kategori dan Kadar Bantuan Asnaf Zakat di UiTM Cawangan Sabah

Berikut merupakan kategori asnaf zakat di UiTM Cawangan Sabah:-

Jadual 2: Kategori Asnaf Zakat Di UiTM Cawangan Sabah

| Bil | Asnaf         | Keterangan                                                                                                                                                                                                                                                          |
|-----|---------------|---------------------------------------------------------------------------------------------------------------------------------------------------------------------------------------------------------------------------------------------------------------------|
| 1   | Fakir         | Pelajar atau kakitangan Muslim yang datang daripada keluarga yang tidak mempunyai harta yang boleh memenuhi keperluan anggota keluarganya termasuk makanan, pakaian, tempat tinggal dan keperluan-keperluan lain.                                                   |
| 2   | Miskin        | Pelajar atau kakitangan yang datang dari keluarga yang mempunyai harta atau pendapatan yang tidak memenuhi keperluan anggota keluarga sepenuhnya.                                                                                                                   |
| 3   | Fi Sabilillah | Segala bentuk usaha yang berbentuk dakwah Islamiyyah untuk memperkukuhkan dan meningkatkan penghayatan Islam dalam kalangan warga Muslim UiTM.                                                                                                                      |
| 4   | Mualaf        | Pelajar bumiputera bukan Islam atau kakitangan bukan Islam yang memeluk Islam dan imannya perlu diperkukuhkan. Maka dengan pemberian agihan ini diharapkan dapat menguatkan keimanannya terhadap Islam serta mendekatkan orang-orang bukan Islam lain dengan Islam. |

Sumber: (Arahan Amanah Zakat UiTM 2019)

Manakala dari aspek kadar bantuan zakat yang diberikan kepada setiap asnaf zakat adalah seperti berikut:-

Jadual 3: Kadar Bantuan Zakat Mengikut Kategori Asnaf

| Kadar Semester (Maksima) |                               |              |                |              |                              |                              |
|--------------------------|-------------------------------|--------------|----------------|--------------|------------------------------|------------------------------|
|                          | Asasi / Pra Diploma / Diploma |              | Sarjana Muda   |              | Sarjana                      |                              |
|                          | Tiada Pinjaman                | Ada Pinjaman | Tiada Pinjaman | Ada Pinjaman | Tiada Pinjaman               | Ada Pinjaman                 |
| Fakir                    | 1,000.00                      | 500.00       | 1,200.00       | 600.00       | 1,500.00                     | 750.00                       |
| Miskin                   | 800.00                        | 400.00       | 1,000.00       | 500.00       | (2 Kali Sepanjang Pengajian) | (2 Kali Sepanjang Pengajian) |
| Fi Sabilillah            | 600.00                        | 300.00       | 800.00         | 400.00       |                              |                              |

Sumber: (Arahan Amanah Zakat UiTM 2019)



### Proses Permohonan Zakat UiTM Cawangan Sabah

Permohonan zakat secara rasminya dibuka dua kali setahun berdasarkan kalendar akademik universiti iaitu sesi Oktober- Februari dan Mac-Julai. Namun begitu, permohonan adalah terbuka sepanjang tahun di luar waktu yang ditetapkan bagi kes-kes tertentu dan kecemasan yang memerlukan bantuan segera.

Berikut merupakan garis masa dari mula permohonan pelajar sehingga mereka menerima bantuan zakat mengikut sesi akademik :

| Bil | Minggu Sesi Akademik | Perkara                                                           |
|-----|----------------------|-------------------------------------------------------------------|
| 1   | Minggu Ke-1-4        | Permohonan Zakat Dibuka                                           |
| 2.  | Minggu Ke-5          | Proses Pemilihan Pelajar Yang Layak Untuk Temubual Zakat          |
| 3   | Minggu Ke-6          | Pengumuman Pelajar Yang Layak Untuk Temubual Zakat                |
| 4   | Minggu Ke-7 dan 8    | Temubual Zakat Oleh Panel Penemuramah                             |
| 5   | Minggu Ke-9          | Proses Pemilihan Pelajar Yang Berjaya Menerima Zakat              |
| 6   | Minggu Ke-10         | Mesyuarat Jawatankuasa Agihan Zakat Untuk Meluluskan Agihan Zakat |
| 7   | Minggu Ke-11         | Pengumuman Pelajar Yang Berjaya Menerima Zakat                    |
| 8   | Minggu Ke-12         | Bantuan Zakat Mula Dimasukkan Dalam Akaun Bank Penerima           |

Permohonan bantuan zakat UiTM Cawangan Sabah adalah secara atas talian melalui *link google form* yang disediakan. Pemberitahuan berkenaan permohonan zakat diberitahu melalui laman web UiTM Cawangan Sabah dan juga media sosial. Pelajar juga dikehendaki memuat naik dokumen sokongan untuk permohonan zakat ini seperti salinan kad pengenalan, slip gaji ibu bapa/penjaga dan dokumen lain yang relevan (Laporan Agihan Zakat UiTM Cawangan Sabah Tahun 2021, 2022).

Bagi pemohon yang berjaya untuk ke sesi temuramah, pemohon hendaklah menjalani proses temubual dengan panel dan pada tarikh yang ditetapkan. Ketika situasi wabak Covid-19 dan Perintah Kawalan Pergerakan (PKP) mula diperkenalkan pada tahun 2020, kuliah dijalankan sepenuhnya atas talian dan tidak memerlukan pelajar berada di kampus. Oleh itu, sesi temubual juga berlangsung secara atas talian samada melalui perbualan telefon, *video call* ataupun melalui aplikasi *whatsapp* (Laporan Agihan Zakat UiTM Cawangan Sabah Tahun 2021, 2022).

Berikut merupakan syarat permohonan zakat yang perlu dipenuhi oleh setiap pemohon:-

- Beragama Islam
- Pelajar UiTM sepenuh masa yang mengikuti pengajian di peringkat Pra, Diploma dan Ijazah Sarjana Muda
- Tidak dikenakan sebarang tindakan tatatertib oleh pihak Universiti
- Pelajar hanya layak membuat sekali permohonan bagi setiap semester
- Pelajar yang mempunyai masalah kewangan dan yatim piatu adalah digalakkan untuk memohon
- Keutamaan diberikan kepada pelajar yang tidak mendapat bantuan kewangan daripada mana-mana institusi kewangan seperti PTPTN, Yayasan Negeri dan sebagainya
- Memenuhi syarat had kifayah dan kategori asnaf yang ditetapkan.

### Cabaran Pengurusan Agihan Zakat di UiTM Cawangan Sabah

Setelah beroperasi sekian lama dalam mengagihkan zakat kepada pelajar, sudah pasti ada banyak cabaran yang perlu dihadapi dalam menjalankan tanggungjawab tersebut. Antaranya ialah kekurangan tenaga kerja untuk melaksanakan tanggungjawab mengagihkan zakat kepada pelajar. Dari segi organisasi, Unit Zakat, Sedekah dan Wakaf hanya mempunyai Kordinator tanpa staf tetap yang lain. Ini adalah sangat mencabar kerana koordinator yang dilantik itu perlu bukan hanya fokus pada urusan zakat sahaja bahkan merangkumi urusan sedekah dan wakaf di kampus. Begitu juga tanggungjawab menemuramah pelajar yang ramai juga memerlukan lebih ramai anggota panel penemuramah zakat.



Selain itu, jumlah permohonan zakat yang tinggi setiap tahun lebih-lebih lagi ketika waktu wabak Covid-19 menyebabkan sebahagian pelajar terpaksa ditolak permohonan mereka walaupun layak menerima zakat kerana kekangan dana zakat yang dapat diagihkan kepada mereka.

Begitu juga cabaran memastikan kesahihan maklumat yang diberikan oleh pelajar yang memohon zakat terutamanya berkaitan pengesahan pendapatan ibubapa/penjaga dan samada pelajar ada menerima biasiswa atau PTPTN.

### Cadangan Meningkatkan Kecekapan Proses Agihan Zakat di UiTM Cawangan Sabah

Terdapat beberapa cadangan yang boleh dipertimbangkan untuk menambah kecekapan proses agihan zakat di UiTM Cawangan Sabah:-

- Menambah staf di bawah koordinator untuk menjaga portfolio yang berasingan iaitu zakat, sedekah dan wakaf.
- Mengurangkan masa dari tempoh permohonan zakat sehingga berjaya menerima zakat dari 12 minggu ke 10 minggu atau kurang.
- Menambah bilangan penemuramah zakat untuk memendekkan tempoh temubual zakat.
- Memperhebat usaha untuk mencari dana zakat selain daripada pihak MUIS.

### Kesimpulan

Inisiatif yang dilakukan oleh UiTM Cawangan Sabah untuk melaksanakan pengurusan zakat di dalam kampus dari aspek agihan zakat telah memberi manfaat kepada warga UiTM Cawangan Sabah khususnya para pelajar dari asnaf fakir dan miskin dalam meneruskan pengajian mereka di sini. Pelaksanaan sistem zakat di UiTM Cawangan Sabah samada dari aspek tadbir-urus dan proses agihan zakat juga merupakan suatu model yang boleh dikongsi dengan institusi pendidikan tinggi yang lain. Walaupun UiTM Cawangan Sabah berjaya melaksanakan sistem pengurusan zakat dengan baik, terdapat beberapa aspek yang boleh dilakukan penambahbaikan agar pengurusan dan pengagihan zakat lebih mantap dan berkesan. Ini sekaligus dapat meningkatkan kepercayaan MUIS, badan-badan korporat dan swasta serta individu untuk memberikan sumbangan zakat dan lain-lain kepada UiTM Cawangan Sabah.

### Rujukan

Arahan Amanah Zakat UiTM (2019).

Bahagian Hal Ehwal Pelajar UiTM. <https://hep.uitm.edu.my/main>. (diakses pada 12 Ogos 2022).

Buletin TV3, Youtube. *Pengumuman Khas: Perintah Kawalan Pergerakan Bermula 18 Mac Hingga 31 Mac*. <https://www.youtube.com/watch?v=WM3bxAArmv4>. (diakses pada 17 Mac 2022).

Jawatankuasa Perunding Projek Q5S ITM (1996), *Kertas Konsep Projek Q5S ITM*, Shah Alam : ITM.

Jawatankuasa Perunding Tabung Amanah Zakat ITM (1997), *Kertas Cadangan Pungutan dan Agihan Zakat Di Institut Teknologi MARA*.

Muhammad, R., *et al.* (2017). Lokalisasi Unit Zakat Institusi Pengajian Tinggi Sebagai One-Stop Center Agihan Zakat Pendidikan. *Journal of Fatwa Management and Research* 10(1): 51-72.

Najahudin Lateh, Muhamad Rahimi Osman & Ghafarullahuddin Din. (2018). Aplikasi Ekonomi Digital Dalam Pengurusan Zakat dan Filantropi Islam di Universiti Teknologi MARA (UiTM) Dalam Najahudin Lateh *et al.*, (Ed.) *Aplikasi Pengurusan Zakat di Malaysia*. Shah Alam: Penerbit UiTM.

\_\_\_\_\_. (2019). Sorotan Historika 20 Tahun Kutipan dan Agihan Zakat di Universiti Teknologi MARA. *Jurnal Pengurusan dan Penyelidikan Fatwa*, 18(3), 197-210.

Nazrudin Hashim & Mohd Zainoddin Mustaffa (2012). Pengurusan Zakat di IPTA: Pengalaman dan Cabaran di UiTM Dalam The 8<sup>th</sup> UiTMCJ Academic Conference. Segamat: UiTM Johor.

Pekeliling Naib Canselor Bil 06 Tahun 2019.

The Malaysian Medical Gazette. COVID-19: *Maksud Perintah Kawalan Pergerakan (Movement Control Order)*. <https://www.mm Gazette.com/covid-19-maksud-perintah-kawalan-pergerakan-movement-control-order-dr-farizah-hairi-dr-zaki-hilmi/>. (diakses pada 17 Mac 2022).

eISSN 2948-5045



9 7 7 2 9 4 8 5 0 4 0 0 1